

四庫全書薈要

• 乾隆御覽本

史部

欽定四庫全書薈要

史部

通鑑紀事本末卷一上



詳校官員外郎臣楊世綸

御製通鑑紀事本末題辭

資治開宗司馬傳分門紀事尚書沿沈袁題要臚從古  
馮谷研精輯續編監夏監殷吁凜若亦文亦質洵彬然  
百王後是誰承者師保如臨切惕乾

密言造膝有誰知屋漏分明顯在茲盤古前文尚疏畧  
三皇後事大昭垂宅心敬肆惟幾爾享世短長率繫之  
給札西清供乙覽要於法戒勵孜孜

乾隆丙子季夏

右謹依

御製詩二集恭錄

通鑑紀事本末目錄

卷一上

三家分晉

秦并六國一

卷一下

秦并六國二

秦桀亡秦

卷二上

高帝滅楚

諸將之叛

卷二下

匈奴和親

諸呂之變

南粵稱藩

七國之叛

梁孝王驕恣

卷三上

漢通西南夷

淮南謀反

漢通西域

武帝伐匈奴

卷三下

武帝平兩越

武帝擊朝鮮

武帝惑神怪

巫蠱之禍

燕蓋謀逆

卷四上

霍光廢立

趙充國破羌

卷四中



匈奴歸漢

卷四下

恭顯用事

成帝淫荒

河決之患

卷五上

丁傳用事

董賢嬖倖

王莽篡漢一

卷五下

王莽篡漢二

光武中興

卷六上

光武平赤眉

光武平漁陽

光武平齊

光武平隴蜀

卷六下

楚王英之獄

馬后抑外家

竇氏專恣

西域歸附

卷七上

兩匈奴叛服

諸羌叛服

卷七下

鮮卑寇邊

嬖倖廢立

梁氏之變

卷八上

宦官亡漢一

黨錮之禍  
董卓之亂

卷八中

宦官亡漢二

卷八下

黃巾之亂

韓馬之叛

袁紹討公孫瓚

卷九上

曹操篡漢

卷九下

孫氏據江東

劉備據蜀

卷十上

吳蜀通好

諸葛亮出師

平南中附

吳侵淮南

魏平遼東

卷十下

明帝奢靡

司馬懿誅曹爽

吳易太子

諸葛恪寇淮南

孫琳逆即附

卷十一上

魏滅蜀

淮南三叛

司馬氏篡魏

卷十一下

晉滅吳

羌胡之叛

樹機能

齊萬年

陳敏之叛

卷十二上

西晉之亂一

賈氏 諸王 江左中興附

胡羯

卷十二下

西晉之亂二



卷十三上

劉淵據平陽

殺太弟又附

慕容據鄴

成李據蜀

卷十三下

張氏據涼

王敦平湘漢

石勒寇河朔

前趙平秦隴

石勒滅前趙

氏據仇池

卷十四上

祖逖北伐

王敦之亂

蘇峻之亂

卷十四下

燕討段遼

討宇文附

趙魏亂中原

冉閔滅石氏

卷十五上

江左經略中原

桓溫伐燕

桓溫滅蜀

桓溫廢立

卷十五下

符氏據長安

符堅篡立

符秦滅涼

符秦滅燕

卷十六上

慕容叛秦復燕

肥水之役慕容滅西燕

姚萇滅秦

卷十六下

丁零叛燕

拓跋興魏

魏伐後燕  
慕容德據廣固附

卷十七上

僞楚之亂

盧循之亂

卷十七下

譙縱之亂

呂光據姑臧

乞伏據金城

禿髮據廣武

蒙遜據張掖

秦滅後涼

卷十八上

馮跋滅後燕

蒙遜伐西涼

乞伏滅南涼

蒙遜伐西秦

劉裕滅南燕

劉裕滅後秦

卷十八下

赫連據朔方

魏滅北燕

魏滅夏

魏滅北涼

魏平仇池

卷十九上

劉裕篡晉

元魏寇宋

徐傳廢立

彭城王專政

卷十九下

宋文圖恢復

宗愛弒逆



太子劬弑逆

南郡王之叛

竟陵王之叛

卷二十上

廢帝之亂

宋明帝北伐

卷二十下

蕭道成篡宋

魏遷洛陽

蕭鸞篡弒

卷二十一上

元魏寇齊

蕭衍篡齊

卷二十一下

南北交兵

魏伐柔然

卷二十二上

肇忠用事

邢巒寇巴西

梁魏爭淮堰

元乂幽后

六鎮之叛

卷二十二下

元顥入洛

元魏之亂

卷二十三上

魏分東西

高氏篡東魏

北齊

宇文篡西魏

後周

卷二十三下

侯景之亂

卷二十四上

梁氏亂亡

陳霸先篡梁附

西魏取蜀

卷二十四中

蕭勃據嶺南

王琳奔齊

陳伐齊附

齊顯祖狂暴

常山王篡立附

卷二十四下

安成王篡立

周陳之叛

宇文護逆節

周伐齊

周齊爭宜陽附

吐谷渾盛衰

卷二十五上

周滅齊

楊堅篡周

始興王謀逆

卷二十五下

隋滅陳

隋易太子

卷二十六上

突厥朝隋

隋討高麗

卷二十六下

煬帝亡隋

高祖興唐

卷二十七上

唐平東都

李密 王世充

卷二十七下

唐平河朔

竇建德

唐平隴右

薛舉

唐平河西

李軌

唐平河東

劉武周



唐平江陵

蕭統

唐平江淮

杜伏威  
沈滄興

李子通  
輔公柝

唐平山東

劉黑闥

卷二十八上

太宗平內難

太宗易太子

太宗平突厥

卷二十八下

唐平鐵勒

唐平西突厥

太宗討龜茲

太宗平高昌

太宗平吐谷渾

卷二十九上

貞觀君臣論治

卷二十九中

唐平遼東

吐蕃請和

卷二十九下

突厥叛唐

唐平奚契丹

卷三十上

武韋之禍一

卷三十中

武韋之禍二

卷三十下

武韋之禍三

太平公主謀逆

卷三十一上

李林甫專政

姦臣聚斂

字文融  
王鉉

楊慎  
到 韋堅

楊氏之寵

安史之亂一

卷三十一中

安史之亂二

卷三十一下

安史之亂三

卷三十二上

劉展之叛

李輔國用事

張后

程元振附

僕固懷恩之叛

周智光附

元載專政

卷三十二下

吐蕃入寇

代宗 幸陝

兩稅之弊

裴延齡姦蠹

吐蕃叛盟

卷三十三上

藩鎮連兵一

涇源之變

李懷光之叛附

卷三十三下

藩鎮連兵二

卷三十四上

伍文用事

憲宗平蜀

劉闢

憲宗平吳

李錡

魏博歸朝

田弘正

憲宗討成德

王承宗

憲宗平淮蔡

吳元濟

憲宗討吳少誠附

卷三十四下

憲宗討淄青

李師道

河朔再叛

卷三十五上

南詔歸附

宦官弑逆

甘露之變附



卷三十五下

朋黨之禍

武宗平澤潞

劉稹

裘甫寇浙東

卷三十六上

龐勛之亂

回鶻叛服

卷三十六下

吐蕃衰亂

唐復河湟附

蠻導南詔入寇

李克用歸唐

卷三十七上

黃巢之亂

卷三十七中

藩鎮之亂

卷三十七下

楊行密據淮南

王建據蜀

卷三十八上

諸鎮相攻

朱溫取淄青

卷三十八下

朱溫篡唐

宦官之亂

郢王篡弒

李氏據鳳翔

岐蜀相攻附

卷三十九上

錢氏據吳越

董昌僭逆附

王氏據閩中

卷三十九下

劉氏據廣州

高氏據荆南

徐氏篡吳

卷四十上

馬氏據湖南

晉王滅燕

卷四十中

後唐滅梁一

卷四十下

後唐滅梁二

莊宗滅蜀

卷四十一上

鄴都之變

李紹琛之叛

安重誨專權

秦王之亂

游王墓賦附

卷四十一下

契丹入寇

孟知祥據蜀

石晉篡後唐

范楊之叛

范廷光

楊光遠

卷四十二上

契丹滅晉

劉智遠復汴京附

三叛連兵

卷四十二下

郭威篡漢

劉旻據河東

世宗征淮南

臣等謹案通鑑紀事本末四十二卷宋袁樞

撰樞字機仲建安人孝宗初試禮部詞賦第一歷官工部侍郎以右文殿修撰知江陵府尋提舉太平興國宮事蹟具宋史本傳考劉知幾史通叙述史例始于六家歸于二體載筆者遞相祖述不過紀傳編年兩法其間列朝正史繁賾難稽司馬光乃用編年之法輯為資治通鑑最稱詳贍而卷帙浩博或一事而首尾遼隔讀者仍驟難得其端緒樞因為



之區別事目以類貫串勒成此書號紀事本  
末每篇各加標題始於三家分晉終於周世  
宗征淮南蓋合紀傳編年二者而變通之其  
例實樞所獨創前此未有也書中苞括數千  
年事迹而經緯明晰節目詳具凡前後始末  
無不一覽了然實足為學史者津逮之助王  
應麟玉海稱淳熙三年十一月叅政龔茂良  
言樞所編紀事有益見間詔嚴州摹印十部

仍先以繕本上之宋史樞本傳又稱孝宗讀而嘉歎以賜東宮及分賜江上諸帥曰治道盡在是矣朱子亦稱其書部居門目始終離合之間皆由有微意於以錯綜溫公之書乃國語之流蓋樞所綴集雖不出通鑑原文而去取剪裁其義例極為精審非割裂掇擷可比其後如陳邦瞻谷應泰等遞有沿仿而大指之簡當要無過於是書焉乾隆四十二年

九月恭校上

總纂官臣紀昀臣陸錫熊臣孫士毅

總校官臣陸費墀



通鑑紀事本末敘

初予與子袁子同為太學官子袁子錄也予博士也志同志行同行言同言也後一年子袁子分教嚴陵後一年予出守臨漳相見於嚴陵相勞苦相樂且相櫛以學子袁子因出書一編蓋通鑑之本末也予讀之大抵塞事之成以後於其萌提事之微以先於其明其情匿而泄其故悉而約其作窺而櫛其究遐而邇其於治亂存亡蓋病之源醫之方也予每讀通鑑之書見事之肇於

斯則惜其事之不竟於斯蓋事以年隔年以事析遭其  
初莫繹其終攬其終莫志其初如山之我如海之茫蓋  
編年繫日其體然也今讀子袁子此書如生乎其時親  
見乎其事使人喜使人悲使人鼓舞未既而繼之以歎  
且泣也嗟乎由周秦以來曰諸侯曰大盜曰女主曰外  
戚曰宦官曰權臣曰夷狄曰藩鎮國之病亦不一矣而  
其源不一哉蓋安史之亂則林甫之為也藩鎮之亂則  
令孜之為也其源不一哉得其病之之源則得其醫之之

方矣此書是也有國者不可以無此書前有姦而不察  
後有邪而不悟學者不可以無此書進有行而無徵退  
有蓄而無宗此書也其入通鑑之戶歟雖然覩人之病  
戚人之病理人之病得人之病至於身之病不惜焉不  
諱焉不醫之距焉不醫而繆其醫焉古亦稀矣彼闇而  
此昭宜也切於人紓於身可哀也夫淳熙元年三月戊  
子廬陵楊萬里敘

通鑑一書於治道最切實諸史之精華百代之龜鏡古

未有也神宗皇帝深所愛重錫資治之嘉名且命經筵  
進讀歷朝寶之永以為訓近世建安袁公復作紀事本  
末區別條流各從其類宜求加於通鑑之外哉蓋通鑑  
以編年為宗本末以比事為體編年則雖一事而歲月  
遼隔比事則雖累載而脉絡貫聯故讀通鑑者如登高  
山泛巨海未易遽覩其津涯得本末而閱之則根幹枝  
葉繩繩相生不待反覆它卷而瞭然在目中美故本末  
者通鑑之戶牖也袁公之為是書其殆司馬文正之疏



附先後也歟與憲淳祐士子退而里居四年之間熟得  
繙閱每見世道開泰君明臣良百度修舉四裔賓服使  
人忻悅愛慕至若叔世末造賢愚倒植綱頽紐解外阻  
內訌使人感憤歎息要其指歸治未始不由於任君子  
亂未始不由於親小人安未始不由於固民心危未始  
不由於困民力忠實事上者未有不昌姦諛欺君者未  
有不亡公廉宏濟者奕世流芳貪刻暴殄者子孫貽殃  
天道人事其應靡忒叅稽源委可以昭勸戒於方來是

書之關於世教亦大矣嚴陵舊本字小且訛乃易為大  
書精加讎校以私錢重刊之非特便老眼訓子弟庶與  
四方朋友共之云寶祐丁巳秋七月朔古汴趙與憲謹  
書

通鑑紀事本末有功於溫公通鑑者不可無也誠齋敘  
之於前節齋敘之於後發明盡矣節齋患嚴陵本字小  
且訛於是精加讎校易為大字刊版而家藏之凡四千  
五百面可謂天下之善本也頃年士學陋藝苑蕪此版

東之高閣者四十餘年又懼其為勢家所奪也祕不示  
人一日節齋孫趙明安者過嘉禾謁學宮目擊余所為  
若不懈者乃嘆曰吾有所託矣庶幾不負吾祖之用心  
矣始出所藏書板示余曰昔有雲間好事者出中統鈔  
三百定求市吾不忍售恐流散而不能久其傳也若真  
之嘉禾學宮償吾半直亦無憾矣余集學之士議之或  
曰此書幸矣然挾貴勢而覬覦者得無為學校累乎或  
曰全是書以惠後學者厚德也挾貴勢而不償直者賢

者不為夫何懼議未決適御史宋公一齋僉憲鄧公善之按臨是邦良弼白其事二公大喜曰有補文治其速成之學官方有助初試闡之費力不能如趙所需乃出中統鈔七十五定償之趙亦不計也因書得板顛末于節齋敘次後之官於學者庶幾知所寶焉昔延祐六年歲在己未三月望日郡文學掾宣城陳良弼識

通鑑紀事本末卷一上

宋 袁樞 撰

三家分晉

周威烈王二十三年 初命晉大夫魏斯趙籍韓虔為  
諸侯

臣光曰臣聞天子之職莫大於禮禮莫大於分分莫大  
於名何謂禮紀綱是也何謂分君臣是也何謂名公侯  
卿大夫是也夫以四海之廣兆民之衆受制於一人雖

有絕倫之力高世之智莫敢不奔走而服役者豈非以禮為之綱紀哉是故天子統三公三公率諸侯諸侯制卿大夫卿大夫治士庶人貴以臨賤賤以承貴上之使下猶心腹之運手足根本之制支葉下之事上猶手足之衛心腹支葉之庇本根然後能上下相保而國家治安故曰天子之職莫大於禮也文王序易以乾坤為首孔子繫之曰天尊地卑乾坤定矣卑高以陳貴賤位矣言君臣之位猶天地之不可易也春秋抑諸侯尊周室

王人雖微序於諸侯之上以是見聖人於君臣之際未  
嘗不惓惓也非有桀紂之暴湯武之仁人歸之天命之  
君臣之分當守節伏死而已矣是故以微子而代紂則  
成湯配天矣以季札而君吳則太伯血食矣然二子寧  
亡國而不為者誠以禮之大節不可亂也故曰禮莫大  
於分也夫禮辨貴賤序親疏裁羣物制庶事非名不著  
非器不形名以命之器以別之然後上下粲然有倫此  
禮之大經也名器既亡則禮安得獨存哉昔仲叔于奚

有功於衛辭邑而請繁纓孔子以為不如多與之邑惟  
器與名不可以假人君之所司也政亡則國家從之衛  
君待孔子而為政孔子欲先正名以為名不正則民無  
所措手足夫繁纓小物也而孔子惜之正名細務也而  
孔子先之誠以名器既亂則上下無以相有故也夫事  
未有不生於微而成於著聖人之慮遠故能謹其微而  
治之衆人之識近故必待其著而後救之治其微則用  
力寡而功多救其著則竭力而不能及也易曰履霜堅



冰至書曰一日二日萬幾謂此類也故曰分莫大於名也嗚呼幽厲失德周道日衰綱紀散壞下陵上替諸侯專征大夫擅政禮之大體什喪七八矣然文武之祀猶縣縣相屬者蓋以周之子孫尚能守其名分故也何以言之昔晉文公有大功於王室請隧於襄王襄王不許曰王章也未有代德而有二王亦叔父之所惡也不然叔父有地而隧又何請焉文公於是乎懼而不敢違是故以周之地則不大於曹滕以周之民則不衆於邾莒

然歷數百年宗主天下雖以晉楚齊秦之彊不敢加者  
何哉徒以名分尚存故也至於季氏之於魯田常之於  
齊白公之於楚智伯之於晉其勢皆足以逐君而自為  
然而卒不敢者豈其力不足而心不忍哉乃畏奸名犯  
分而天下共誅之也今晉大夫暴蔑其君剖分晉國天  
子既不能討又寵秩之使列於諸侯是區區之名分復  
不能守而并棄之也先王之禮於斯盡矣或者以為當  
是之時周室微弱三晉彊盛雖欲勿許其可得乎是大

不然夫三晉雖彊苟不顧天下之誅而犯義侵禮則不請於天子而自立矣不請於天子而自立則為悖逆之臣天下苟有桓文之君必奉禮義而征之今請於天子而天子許之是受天子之命而為諸侯也誰得而討之故三晉之列於諸侯非三晉之壞禮乃天子自壞之也嗚呼君臣之禮既壞矣則天下以智力相雄長遂使聖賢之後為諸侯者社稷無不泯絕生民之類靡滅幾盡豈不哀哉

初智宣子將以瑤為後智果曰不如宵也瑤之賢於人者五其不逮者一也美鬚長大則賢射御足力則賢伎藝畢給則賢巧文辯慧則賢彊毅果敢則賢如是而甚不仁夫以其五賢陵人而以不仁行之其誰能待之若果立瑤也智宗必滅弗聽智果別族於太史為輔氏趙簡子之子長曰伯魯幼曰無恤將置後不知所立乃書訓戒之辭於二簡以授二子曰謹識之三年而問之伯魯不能舉其辭求其簡已失之矣問無恤誦其辭甚習

求其簡出諸袖中而奏之於是簡子以無恤為賢立以  
為後簡子使尹鐸為晉陽請曰以為繭絲乎抑為保障  
乎簡子曰保障哉尹鐸損其戶數簡子謂無恤曰晉國  
有難而無以尹鐸為少無以晉陽為遠必以為歸及智  
宣子卒智襄子為政與韓康子魏桓子宴於藍臺智伯  
戲康子而侮段規智國聞之諫曰主不備難必至矣智  
伯曰難將由我我不為難誰敢興之對曰不然夏書有  
之曰一人三失怨豈在明不見是圖夫君子能勤小物

故無大患今主一宴而耻人之君相又弗備曰不敢興  
難無乃不可乎螭蟻蜂蠆皆能害人况君相乎弗聽智  
伯請地於韓康子康子欲弗與段規曰智伯好利而懷  
不與將伐我不如與之彼狃於得地必請於佗人佗人  
不與必嚮之以兵然則我得免於患而待事之變矣康  
子曰善使使者致萬家之邑於智伯智伯悅又求地於  
魏桓子桓子欲弗與任章曰何故弗與桓子曰無故索  
地故弗與任章曰無故索地諸大夫必懼吾與之地智

伯必驕彼驕而輕敵此懼而相親以相親之兵待輕敵  
之人智氏之命必不長矣周書曰將欲敗之必姑輔之  
將欲取之必姑與之主不如與之以驕智伯然後可以  
擇交而圖智氏矣柰何獨以吾為智氏質乎桓子曰善  
復與之萬家之邑 智伯又求蔡臯狼之地於趙襄子  
襄子弗與智伯怒帥韓魏之甲以攻趙氏襄子將出曰  
吾何走乎從者曰長子近且城厚完襄子曰民罷力以  
完之又斃死以守之其誰與我從者曰邯鄲之倉庫實

襄子曰浚民之膏澤以實之又因而殺之其誰與我其  
晉陽乎先主之所屬也尹鐸之所寬也民必和矣乃走  
晉陽三家以國人圍而灌之城不浸者三版沈竈產鼃  
民無叛意智伯行水魏桓子御韓康子驂乘智伯曰吾  
乃今知水可以亡人國也桓子肘康子康子履桓子之  
跗以汾水可以灌安邑絳水可以灌平陽也絺疵謂智  
伯曰韓魏必反矣智伯曰子何以知之絺疵曰以人事  
知之夫從韓魏之兵而攻趙亡難必及韓魏矣今約



勝趙而三分其地城不沒者三版人馬相食城降有日而二子無喜志有憂色是非反而何明日智伯以締疵之言告二子二子曰此夫讒臣欲為趙氏游說使主疑於二家而懈於攻趙氏也不然夫二家豈不利朝夕分趙氏之田而欲為危難不可成之事乎二子出締疵入曰主何以臣之言告二子也智伯曰子何以知之對曰臣見其視臣端而趨疾知臣得其情故也智伯不悛締疵請使於齊趙襄子使張孟談潛出見二子曰臣聞脣

亡則齒寒今智伯帥韓魏而攻趙趙亡則韓魏為之次  
矣二子曰我心知其然也恐事未遂而謀泄則禍立至  
矣張孟談曰謀出二主之口入臣之耳何傷也二子乃  
陰與張孟談約為之期日而遣之襄子夜使人殺守隄  
之吏而決水灌智伯軍智伯軍救水而亂韓魏翼而擊  
之襄子將卒犯其前大敗智伯之衆遂殺智伯盡滅智  
氏之族唯輔果在

臣光曰智伯之亡也才勝德也夫才與德異而世俗莫

之能辨通謂之賢此其所以失人也夫聰察彊毅之謂才正直中和之謂德才者德之資也德者才之帥也雲夢之竹天下之勁也然而不矯揉不羽括則不能以入堅棠谿之金天下之利也然而不鎔範不砥礪則不能以擊彊是故才德全盡謂之聖人才德兼亡謂之愚人德勝才謂之君子才勝德謂之小人凡取人之術苟不得聖人君子而與之與其得小人不若得愚人何則君子挾才以為善小人挾才以為惡挾才以為善者善無

不至矣挾才以為惡者惡亦無不至矣愚者雖欲為不善智不能周力不能勝譬之乳狗搏人人得而制之小人智足以遂其姦勇足以決其暴是虎而翼者也其為害豈不多哉德者人之所嚴而才者人之所愛愛者易親嚴者易疎是以察者多蔽於才而遺於德自古昔以來國之亂臣家之敗子才有餘而德不足以至於顛覆者多矣宣特智伯哉故為國為家者苟能審於才德之分而知所先後又何失人之足患哉

三家分智氏之田趙襄子漆智伯之頭以為飲器智伯之臣豫讓欲為之報仇乃詐為刑人挾匕首入襄子宮中塗廁襄子如廁心動索之獲豫讓左右欲殺之襄子曰智伯死無後而此人欲為報仇真義士也吾謹避之耳乃舍之豫讓又漆身為癩吞炭為啞行乞於市其妻不識也行見其友其友識之為之泣曰以子之才臣事趙孟必得近幸子乃為所欲為顧不易邪何乃自苦如此求以報仇不亦難乎豫讓曰不可既已委質為臣而又求殺之是

二心也凡吾所為者極難耳然所以為此者將以愧天下後世之為人臣懷二心者也襄子出豫讓伏於橋下襄子至橋馬驚索之得豫讓遂殺之襄子為伯魯之國立也有子五人不肯置後封伯魯之子於代曰代成君早卒立其子浣為趙氏後襄子卒弟桓子逐浣而自立一年卒趙氏之人曰桓子立非襄主意乃共殺其子復迎浣而立之是為獻子獻子生籍是為烈侯魏斯者桓子之孫也是為文侯韓康子生武子武子生虔是為景

侯韓借師於魏以伐趙文侯曰寡人與趙兄弟也不敢  
聞命趙借師於魏以伐韓文侯應之亦然二國皆怒而  
去已而知文侯以講於已也皆朝于魏魏由是始大於  
三晉諸侯莫能與之爭

秦并六國一

周顯王七年秦獻公薨子孝公立孝公生二十一年矣  
是時河山以東彊國六淮泗之間小國十餘楚魏與秦  
接界魏築長城自鄭濱洛以北有上郡楚自漢中南有

巴黔中皆以夷狄遇秦擯斥之不得與中國之會盟於是孝公發憤布德修政欲以彊秦

八年孝公令國中曰昔我穆公自岐雍之間修德行武東平晉亂以河為界西霸戎翟廣地千里天子致伯諸侯畢賀為後世開業甚光美會往者厲蹠簡公出子之不寧國家內憂未遑外事三晉攻奪我先君河西地醜莫大焉獻公即位鎮撫邊境徙治櫟陽且欲東伐復穆公之故地修穆公之政令寡人思念先君之意常痛於



心賓客羣臣有能出奇計彊秦者吾且尊官與之分土  
於是衛公孫鞅聞是令下乃西入秦公孫鞅者衛之庶  
孫也好刑名之學事魏相公叔痤痤知其賢未及進會  
病魏惠王往問之曰公叔病有如不可諱將奈社稷何  
公叔曰痤之中庶子衛鞅年雖少有奇才願君舉國而  
聽之王嘿然公叔曰君即不聽用鞅必殺之無令出境  
王許諾而去公叔召鞅謝曰吾先君而後臣故先為君  
謀後以告子子必速行矣鞅曰君不能用子之言任臣

又安能用子之言殺臣乎卒不去王出謂左右曰公叔病甚悲乎欲令寡人以國聽衛鞅也既又勸寡人殺之豈不悖哉衛鞅既至秦因嬖臣景監以求見孝公說以富國彊兵之術公大悅與議國事

十年衛鞅欲變灋秦人不悅衛鞅言於秦孝公曰夫民不可與慮始可與樂成論至德者不和於俗成大功者不謀於衆是以聖人苟可以彊國不灋其故甘龍曰不然緣灋而治者吏習而民安之衛鞅曰常人安於故俗

學者溺於所聞以此兩者居官守灋可也非所與論於  
灋之外也智者作灋愚者制焉賢者更禮不肖者拘焉  
公曰善以衛鞅為左庶長卒定變灋之令令民為什伍  
而相收司連坐告姦者與斬敵首同賞不告姦者與降  
敵同罰有軍功者各以率受上爵為私鬪者各以輕重  
被刑大小僇力本業耕織致粟帛多者復其身事末利  
及怠而貧者舉以為收孥宗室非有軍功論不得屬籍  
明尊卑爵秩等級各以差次名田宅臣妾衣服有功者

顯榮無功者雖富無所芬華今既具未布恐民之不信  
乃立三丈之木於國都市南門募民有能徙置北門者  
予十金民怪之莫敢徙復曰能徙者予五十金有一人  
徙之輒予五十金乃下令行朞年秦民之國都言新  
令之不便者以千數於是太子犯灋衛鞅曰灋之不行  
自上犯之太子君嗣也不可施刑刑其傅公子虔黥其  
師公孫賈明日秦人皆趨令行之十年秦國道不拾遺  
山無盜賊民勇於公戰怯於私鬪鄉邑大治秦民初言

令不便者有來言令便者衛鞅曰此皆亂瀾之民也盡遷之於邊其後民莫敢議令

臣光曰夫信者人君之大寶也國保於民民保於信非信無以使民非民無以守國是故古之王者不欺四海霸者不欺四鄰善為國者不欺其民善為家者不欺其親不善者反之欺其鄰國欺其百姓甚者欺其兄弟欺其父子上不信下下不信上上下下離心以至於敗所利不能藥其所傷所獲不能補其所亡豈不哀哉昔齊桓

公不背曹沫之盟晉文公不貪伐原之利魏文侯不棄  
虞人之期秦孝公不廢徙木之賞此四君者道非粹白  
而商君尤稱刻薄又處戰攻之世天下趨於詐力猶且  
不敢忘信以畜其民況為四海治平之政者哉

韓懿侯  
亮子昭

立侯

十一年秦敗韓師于西山

十四年秦孝公魏惠王會于杜平

十五年秦敗魏師于元里斬首七千級取少梁

十七年秦大良造衛鞅伐魏

十八年秦衛鞅圍魏固陽降之

十九年秦商鞅築冀闕宮庭於咸陽徙都之令民父子兄弟同室內息者為禁并諸小鄉聚集為一縣縣置令

丞凡三十一縣廢井田開阡陌平斗桶權衡丈尺

趙成侯

太子肅侯立

二十一年秦商鞅更為賦稅灋行之

二十六年王致伯于秦諸侯皆賀秦秦孝公使公子少

官帥師會諸侯于逢澤以朝王

二十九年衛鞅言於秦孝公曰秦之與魏譬若人之有  
腹心之疾非魏并秦秦即并魏何者魏居嶺阨之西都  
安邑與秦界河而獨擅山東之利利則西侵秦病則東  
收地今以君之賢聖國賴以盛而魏往年大破於齊諸  
侯畔之可因此時伐魏魏不支秦必東徙然後秦據河  
山之固東鄉以制諸侯此帝王之業也公從之使衛鞅  
將兵伐魏魏使公子卬將而禦之軍既相距衛鞅遺公



子卬書曰吾始與公子驩今俱為兩國將不忍相攻可  
與公子面相見盟樂飲而罷兵以安秦魏之民公子卬  
以為然乃相與會盟已飲而衛鞅伏甲士襲虜公子卬  
因攻魏師大破之魏惠王恐使使獻河西之地於秦以  
和因去安邑徙都大梁乃嘆曰吾恨不用公叔之言秦

封衛鞅商於十五邑號曰商君

楚宣王薨子  
威王商立

三十一年秦孝公薨子惠文王立公子虔之徒告商君  
欲反發吏捕之商君亡之魏魏人不受復納之秦商君

乃與其徒之商於發兵北擊鄭秦人攻商君殺之車裂以徇盡滅其家

三十四年秦伐韓拔宜陽

三十六年 初洛陽人蘇秦說秦王以兼天下之術秦王不用其言蘇秦乃去說燕文公曰燕之所以不犯寇被甲兵者以趙之為蔽其南也且秦之攻燕也戰於千里之外趙之攻燕也戰於百里之內夫不憂百里之患而重千里之外計無過於此者願大王與趙從親天下

為一則燕國必無患矣文公從之資蘇秦車馬以說趙  
肅侯曰當今之時山東之建國莫彊於趙秦之所害亦  
莫如趙然而秦不敢舉兵伐趙者畏韓魏之議其後也  
秦之攻韓魏也無有名山大川之限稍蠶食之傳國都  
而止韓魏不能支秦必入臣於秦秦無韓魏之規則禍  
中於趙矣臣以天下之圖案之諸侯之地五倍於秦料  
度諸侯之卒十倍於秦六國為一并力西鄉而攻秦秦  
必破矣夫衡人者皆欲割諸侯之地以與秦秦成則其

身富榮國被秦患而不與其憂是故衡人日夜務以秦權恐惕諸侯以求割地故願大王熟計之也竊為大王計莫如一韓魏齊楚燕趙為從親以畔秦令天下之將相會於洹水之上通質結盟約曰秦攻一國五國各出銳師或撓秦或救之有不如約者五國共伐之諸侯從親以擯秦秦甲必不敢出於函谷以害山東矣肅侯大說厚待蘇秦尊寵賜賚之以約於諸侯會秦使犀首伐魏大敗其師四萬餘人禽將龍賈取雕陰且欲東兵蘇

秦恐秦兵至趙而敗從約念莫可使用於秦者乃激怒  
張儀入之於秦張儀者魏人與蘇秦俱事鬼谷先生學  
縱橫之術蘇秦自以為不及也儀游諸侯無所遇因於  
楚蘇秦故召而辱之儀怒念諸侯獨秦能苦趙遂入秦  
蘇秦陰遣其舍人齎金幣資儀儀得見秦王秦王說之  
以為客卿舍人辭去曰蘇君憂秦伐趙敗從約以為非  
君莫能得秦柄故激怒君使臣陰奉給君資盡蘇君之  
計謀也張儀曰嗟乎此在吾術中而不悟吾不及蘇君

明矣為吾謝蘇君蘇君之時儀何敢言於是蘇秦說韓  
宣惠王曰韓地方九百餘里帶甲數十萬天下之強弓  
勁弩利劍皆從韓出韓卒超足而射百發不暇止以韓  
卒之勇被堅甲蹠勁弩帶利劍一人當百不足言也大  
王事秦秦必求宜陽成臯今茲効之明年又復求割地  
與則無地以給之不與則棄前功受後禍且大王之地  
有盡而秦之求無已以有盡之地逆無已之求此所謂  
市怨結禍者也不戰而地已削矣鄙諺曰寧為雞口無

為牛後夫以大王之賢挾彊韓之兵而有牛後之名臣  
竊謂大王羞之韓王從其言蘇秦說魏王曰大王之地  
方千里地名雖小然而田舍廬廡之數曾無所芻牧人  
民之衆車馬之多日夜行不絕輶輶殷殷若有三軍之  
衆臣竊量大王之國不下楚今竊聞大王之卒武士二  
十萬蒼頭二十萬奮擊二十萬廝徒十萬車六百乘騎  
五千匹乃聽於羣臣之說而欲臣事秦願大王熟察之  
故敝邑趙王使臣効愚計奉明約在大王之詔詔之魏

王聽之蘇秦說齊王曰齊四塞之國地方二千餘里帶甲數十萬粟如丘山三軍之良五家之兵進如鋒矢戰如雷霆解如風雨即有軍役未嘗倍泰山絕清河涉渤海也臨菑之中七萬戶臣竊度之不下戶三男子不待發於遠縣而臨菑之卒固已二十一萬矣臨菑甚富而實其民無不鬪難走狗六博闔鞠臨菑之塗車轂擊人肩摩連衽成帷揮汗成雨夫韓魏之所以重畏秦者為與秦接境壤也兵出而相當不十日而戰勝存亡之機



決矣韓魏戰而勝秦則兵半折四境不守戰而不勝則國已危亡隨其後是故韓魏之所以重與秦戰而輕為之臣也今秦之攻齊則不然倍韓魏之地過衛陽晉之道經乎亢父之險車不得方軌騎不得比行百人守險千人不敢過也秦雖欲深入則狼顧恐韓魏之議其後也是故恫疑虛喝驕矜而不敢進則秦之不能害齊亦明矣夫不深料秦之無奈齊何而欲西面而事之是羣臣之計過也今無臣事秦之名而有彊國之實臣是故

願大王少留意計之齊王許之乃西南說楚威王曰楚天下之彊國也地方六千餘里帶甲百萬車千乘騎萬匹粟支十年此霸王之資也秦之所害莫如楚楚彊則秦弱秦彊則楚弱其勢不兩立故為大王計莫如從親以孤秦臣請令山東之國奉四時之獻以承大王之明詔委社稷奉宗廟練士厲兵在大王之所用之故從親則諸侯割地以事楚衡合則楚割地以事秦此兩策者相去遠矣大王何居焉楚王亦許之於是蘇秦為從約

長并相六國北報趙車騎輜重擬於王者

韓高門成昭侯

堯子宣惠王立

齊威王堯子宣

王辟疆立

燕文公堯子易王立

三十七年秦惠王使犀首欺齊魏與共伐趙以敗從約  
趙肅侯讓蘇秦蘇秦恐請使燕必報齊蘇秦去趙而從  
約皆解趙人決河水以灌齊魏之師乃去 魏以陰晉  
為和於秦寔華陰

三十九年秦伐魏圍焦曲沃魏入少梁河西地于秦

四十年秦伐魏度河取汾陰皮氏拔焦

楚威王堯子懷王槐立

四十一年秦公子華張儀帥師圍魏蒲陽取之張儀言  
於秦王請以蒲陽復與魏而使公子繇質於魏儀因說  
魏王曰秦之遇魏甚厚魏不可以無禮於秦魏因盡入  
上郡十五縣以謝焉儀歸而相秦

四十二年秦歸焦曲沃於魏

四十三年趙肅侯  
亮子武靈王立

四十四年夏四月戊午秦初稱王

四十五年秦張儀帥師伐魏取陝

四十六年秦張儀及齊楚之相會盟桑

四十七年秦張儀自留桑還而免相相魏欲令魏先事秦而諸侯效之魏王不聽秦王伐魏取曲沃平周復陰厚張儀益甚

四十八年王崩子慎靚王定立

燕易王薨子噲立

周慎靚王二年秦伐韓取鄢

魏惠王薨子襄王立

三年楚趙魏韓燕同伐秦攻函谷關秦人出兵逆之五國之師皆敗走

四年秦敗韓師于脩魚斬首八萬級虜其將鯁申差于

濁澤諸侯振恐齊大夫與蘇秦爭寵使人刺秦殺之張儀說魏襄王曰梁地方不至千里卒不過三十萬地四平無名山大川之限卒戍楚韓齊趙之境守亭障者不下十萬梁之地勢固戰場也夫諸侯之約從盟洹水之上結為兄弟以相堅也今親兄弟同父母尚有爭錢財相殺傷而欲恃反覆蘇秦之餘謀其不可成亦明矣大王不事秦秦下兵攻河外據卷衍酸棗劫衛取陽晉則趙不南趙不南而梁不北梁不北則從道絕從道絕則

大王之國欲毋危不可得也故願大王審定計議且賜骸骨魏王乃倍從約而因儀以請成于秦張儀歸復相秦

五年巴蜀相攻擊俱告急於秦秦惠王欲伐蜀以為道險阻難至而韓又來侵猶豫未能決司馬錯請伐蜀張儀曰不如伐韓王曰請聞其說儀曰親魏善楚下兵三川攻新城宜陽以臨二周之郊據九鼎按圖籍挾天子以令於天下天下莫敢不聽此王業也臣聞爭名者於

朝爭利者於市今三川周室天下之朝市也而王不爭  
焉顧爭於戎翟去王業遠矣司馬錯曰不然臣聞之欲  
富國者務廣其地欲彊兵者務富其民欲王者務博其  
德三資者備而王隨之矣今王地小民貧故臣願先從  
事於易夫蜀西僻之國而戎翟之長也有桀紂之亂以  
秦攻之譬如使豺狼逐羣羊得其地足以廣國取其財  
足以富民繕兵不傷衆而彼已服焉拔一國而天下不  
以為暴利盡西海而天下不以為貪是我一舉而名實



附也而又有禁暴止亂之名今攻韓劫天子惡名也而未必利也又有不義之名而攻天下所不欲危矣臣請論其故周天下之宗室也齊韓之與國也周自知失九鼎韓自知亡三川將二國并力合謀以因乎齊趙而求解乎楚魏以鼎與楚以地與魏王弗能止也此臣之所謂危也不如伐蜀完王從錯計起兵伐蜀十月取之貶蜀王更號為侯而使陳莊相蜀蜀既屬秦秦以益彊富

厚輕諸侯

燕王噲以國讓其相子之

六年王崩子赧王延立

卷一上



通鑑紀事本末卷一上

總校官庶吉士 臣 張能照

校對官編修 臣 裴 謙

謄錄監生 臣 倪時慶